



# STINAPA TA INFORMA

## RENBAK NATURAL

Boneiru ta un isla seku kaminda ku pa aña masoméno 500 milimeter di áwaseru ta kai. Tin luna den kua ni un drùp di awa no ta bin abou. E ora ei e isla ta mustra seku, maron i yen di stòf. Despues di un temporada seku asina un bon áwaseru ta un alivio pa tantu bestia komo hende i mata. I pa aña por ta nos no ta haña hopi awa, pero ora áwaseru ta kai porfin no ta wega tampoko! Nos tur konosé e bista di kayanan i hanchinan full bou di awa. Pa dianan largu tin plas di awa ta keda para. E suela di kleps ku nos tin no ta permití hopi awa pasa tampoko. Lo bo kere ku ta fásil pa un isla deshasí di e awa ku ta di mas? E awa por kore bai laman fásil tòg? Pero esei no ta pasa, i pa straño ku e por zona, pa Boneiru ta importante tambe pa e awa no bai stret laman. Fuera ku e tera mester di awa pa su vegetashon, t'asina ku e refnan delikado i úniko por haña daño si den kaso ku tin hopi áwaseru, e awa por lastra tera i lodo bai laman kuné. Den kaso di un asina yamá 'flush' e koral lo keda tapá ku lodo fini. Rayonan di solo no por yega na e koral i e ta muri a konsekuensia di esaki. Fuera di esaki hopi nutriente por resultá den laman i esei por stroba e ekilibrio ekológiko. E efekto direkto di un 'flush' por ser mirá bon for di un avion; un strepi diki di lodo ta hasi e awa trubel. Pero ta unda nos áwaseru mester bai anto? Hopi kas na Boneiru tin un renbak. Pero naturalesa tin su propio renbaknan. Eseinan ta e saliñanan kaminda ku e awa ku ta di mas pa e áreanan ku ta rondoná nan, ta resultá. Boneiru tin hopi di e renbaknan natural aki: Pekelmeer, saliñanan di Vlijt, Mathijs, Frans, Tam i tambe Gotomeer. Klein Bonaire tambe tin saliña. Fuera di kolektá áwaseru, e saliñanan tin un otro funshon importante: nan ta filtra e awa. Awa ku ta logra bai laman al final for di un saliña ta awa limpi. E no tin nutriente ni tera mas den dje. E saliñanan no ta solamente bunita i karakterístiko pa e paisahe di Boneiru, pero nan ta yuda protehá e koral tambe. Sierto saliña manera Gotomeer i Pekelmeer ta asta protehá, grásias na e Akuerdo di Ramsar. Den e Plan di Maneho di Naturalesa gobièrnu ta bisa ku tur saliña i sitio di kolektá awa lo mester ta protehá. Sigur awor ku konstrukshon na Boneiru ta 'den left' i e sistema di manehá awa natural riba Boneiru ta kambiando, e saliñanan ta di gran importansha pa kolektá áwaseru ku ta di mas. *Skirbí pa Trix van Bennekom, tradusí pa Marcel Nahr.*

Pa mas informashon i reakshon: STINAPA, telefon 717 - 8444, [info@stinapa.org](mailto:info@stinapa.org)

## NOS TA BIBA DI NATURALESA



**Traha huntu na un desaroyo duradero pa Boneiru**